

南

漢

書

南漢書卷二

順德梁廷耕章再撰

本紀第二

高祖紀一

高祖天皇大帝初名巖更名陟復名巖改名龔  
終名龔代祖庶子也母段氏生帝外舍武皇后  
素妬聞帝生伏劍於中門使取帝至將殺之家  
人不敢匿及見而驚悸劍輒墮地乃跪而抱之

曰此我家之寶遂自養之冒爲己生旣長善騎射身長七尺垂手能過其膝代祖時爲封州刺史嘗使日者遍視諸子曰唯少者貴耳由是益爲代祖所愛烈宗爲清海軍行軍司馬薛王知柔亦辟帝爲王府諮議參軍及烈宗兼靜海兩鎮節度使乃表帝爲副使時交州曲顥桂州劉士政邕州葉廣畧容州龐巨昭高州劉昌魯新州劉潛各據其地不相統制及江東七十餘寨

亦負隅自固不能平盧光稠據虔州有衆數萬  
聚兵攻嶺上使其弟光睦據湖州子延昌據韶  
州烈宗將攻韶州帝曰韶州有虔湖之援擊之  
則兩州必應首尾受敵宜計取不宜直攻烈宗  
不聽會北江漲糧餽阻絕光稠別將以虔兵來  
掉戰烈宗縱驅伏發敗于城南挺身僅免至是  
始思帝言盡以兵械付之帝先後數年間悉平  
諸寨殺邕州葉廣畧新州劉潛併二州之地更

置刺史烈宗病革遺表薦帝權知雷後始開幕  
府多延致中國名士分領諸州自是無武人爲  
刺史者

乾化元年夏五月甲申朔梁大赦改元賜烈宗  
一子六品正員官甲辰詔帝爲清海軍節度使  
冬十二月帝聞虔州防禦使黎球卒亟發兵攻  
韶州破之逐刺史廖爽進取潮州楚表姚彥章  
權知容州帝遣兵攻之楚使都指揮使許德勳

以桂州之兵救容州爲帝所敗彥章奔遂取容  
州及高州是月貢犀象奇珍及金銀等值數千  
萬

乾化二年夏四月甲戌梁以右散騎常侍韋叡  
等爲潭廣和叶使來勸帝和楚加帝檢校太保  
同平章事帝因貢金銀犀牙雜寶貨名香值數  
千萬詔客省引進使韋堅來以銀茶等值四百  
餘萬附堅還獻六月戊寅梁郢王友珪弑梁帝

自立是歲廣州白龍見

乾化三年春正月甲子梁郢王友珪改元鳳曆  
加帝檢校太傅二月均王友貞卽皇帝位於大  
梁使來宣詔除帝清海建武節度使兼中書令  
襲封南平王冬十二月遣使如楚求昏楚王許  
之

乾化四年春遣供軍巡官陳用拙奉禮幣如吳  
越請以兄事吳越王王許之是歲鬱林州寶圭

洞及韜真觀迎玉宸道君與葛真人二石像於  
南海置石室中

貞明元年秋八月逆婦於楚楚王使其弟永順  
節度使存來送冬十一月乙丑梁改元帝表求  
加都統不許復表求改封南越王亦不許帝嘆  
曰中原多故誰爲真主安能萬里梯航事僞庭  
乎遂與梁絕

貞明二年帝遣幕屬王定保聘於荆南



乾亨元年秋八月癸巳帝卽位僭國號大越大赦  
改元以是年爲乾亨元年追尊祖唐潮州刺史  
仁安曰太祖文皇帝父封州刺史知謙曰代祖  
聖武皇帝母韋氏曰武皇后兄梁南海王隱曰  
烈宗襄皇帝封妻馬氏爲越國夫人升廣州爲  
興王府分南海縣爲咸寧常康徙循州治龍川  
縣置正州於循之歸善縣歸善海豐博羅河源  
隸焉以興寧縣爲齊昌府立常樂州於合浦縣

地博電零綠鹽場隸焉封峻靈山爲峻靈王儋  
州昌化山爲鎮海廣德王建三廟置百官以趙  
光裔爲兵部尙書節度副使楊洞潛爲兵部侍  
郎節度判官李殷衡爲禮部侍郎皆同平章事  
倪曙爲工部侍郎尋改尙書左丞仿唐上京之  
制置左右街使冬十月遣客省使劉瑋如吳告  
卽位且勸吳王稱帝閩王遣使來爲其子牙  
都指揮使延鈞求婚以清遠公主歸之鑄錢文

曰乾亨重寶徑七分重三銖六參建玉堂珠殿  
飾以金碧翠羽悉聚珍寶實之

乾亨二年夏六月蜀主建殂子衍立冬十一月  
帝祀天南郊大赦加恩澤改國號曰漢是歲帝  
幸韶州聽證真寺僧文偃說法賜以章服鑄鉛  
錢二品文並曰乾亨重寶十當銅錢一大者徑  
寸重三銖九參重寶字傅形小者徑九分重如  
銅錢遷雷州治特侶塘

乾亨三年春正月冊立越國夫人馬氏爲皇后  
夏四月吳主隆演卽國王位秋九月丙寅梁削  
帝前封官爵敕吳越王錢鏐來討吳越以道遠  
表辭是歲帝詔僧文偃說法於韶州

乾亨四年春三月兵部侍郎楊洞潛請立學校  
設銓選開貢舉歲放進士明經十餘人如唐制  
帝悉從之夏五月己丑吳主隆演殂弟溥立冬  
十二月遣使如蜀通好是歲柝興王府瀆陽縣

爲英州韶州保昌縣爲雄州作文德殿成著作  
郎陳光又獻賦以珠數升賜之

乾亨五年夏五月丙戌朔梁改元龍德六月乙  
卯朔日有食之是歲以尙書左丞倪曙同平章  
事

乾亨六年夏四月帝用術者言幸梅口鎮避災  
閩將王延美將以兵襲帝未至數十里帝偵知  
遽還是歲製平頂帽國人效之

乾亨七年夏四月己巳晉王李存勗卽皇帝位  
國號大唐改元同光冬十月辛未朔日有食之復  
越裳縣爲茂名是歲帝十子洪杲生

乾亨八年夏四月帝自引兵侵閩屯汀漳境爲  
閩人擊敗歸是歲作南宮王定保獻七奇賦

乾亨九年春正月帝聞唐兵威盛遣宮苑使何  
詞聘於唐且觀強弱二月甲申詞至魏都見唐  
主還奏唐必亂具陳唐主驕淫狀帝遂與唐絕

三月戊申望日有食之夏四月癸亥日有食之  
秋八月白虹入南宮三清殿帝憂異不釋中外  
震懼翰林學士王宏改稱白龍以賀作白龍賦  
上之帝大喜九月甲辰望月有食之冬十一月  
丙辰蜀主煥降於唐十二月詔改元以是年爲  
白龍元年帝更名夔以應之

白龍元年冬十二月辛未閩王審之薨子延翰  
立賜梁嵩等進士有差是歲長和驛信鄭旻遣

其弟昭淳致朱鬃白馬來求婚以襄帝女增城公主歸之中書舍人王詡獻朱鬃白馬賦

白龍二年夏四月唐主遇弒殂李嗣源卽皇帝位改元天成秋八月乙酉朔日有食之冬十月己丑閩王自稱大閩國王十二月辛卯閩王遇弒薨

白龍三年夏五月癸丑閩王璘立秋八月乙卯朔日有食之冬十一月庚戌吳主卽帝位改元



十二月帝幸康州

南漢書卷二終

南漢書考異卷二

順德梁廷枏章冉撰

高祖紀一

初名巖至終名龔

劉氏興亡錄皇考葬段氏得石版有篆文  
曰隱台巖因名其子是初名巖也梁太祖  
實錄乾化元年五月以清海節度副使劉  
陟爲節度使是此時已先改名陟也十國

紀年太祖授陟清海節度使陟復名巖又唐烈祖實錄天祐十四年劉陟僭位改名巖皆改復原名之証或在降節旄時或在稱尊時不可考也歐史白龍見南宮三清殿改元白龍又更名龔有胡僧言讖書滅劉氏者龔也乃採龔字名焉薛史陟季年有梵僧謂不利名龔他年慮有此姓敗事又改名龔讀若儼古文無此字宏簡錄亦

云用番僧言讖書滅劉氏者儼乃採飛龍在天二字合爲龔是改龔後更名龔也惟通鑑始終稱巖考異云今以首尾名巖故但稱劉巖誤又十國春秋引五國故事先主名巖後名俊又改名龔按知不足齋本無名俊之文吳長元跋云向無刊本傳抄多謬如下卷漢先主名巖後名龔注云後又名龔傳本脫去龔字又誤註文後字爲

俊字春秋蓋不知爲後字之訛也今函海本亦云後名俊當如吳氏所云而改元白龍下乃云更名俊又改爲龔則不知何人

所補矣

說郭與知不足齋本同

殺邕州葉廣畧又遂取容州

薛史先是邕州葉廣畧容州龐巨源或自擅兵賦數侵廣之西鄙陟舉兵討之邕容皆敗因附庸於陟歐史又西與馬殷爭容

桂殷取桂管龔取容管逐巨昭又取邕管  
九國志巨昭爲容州觀察使挈其族歸長  
沙按巨昭旣以容附楚南漢乃爭而取之  
邕州之陷廣畧亦被殺薛史云附庸於陟  
誤也

發兵攻韶州

海陽志在乾化四年今從通鑑

獻金銀犀牙雜寶名香值數千萬

十國春秋貢名香等價凡數十萬今從薛

史

詔客省引進韋堅來以銀茶等值四百餘萬附  
堅還獻

十國春秋遣使貢名香等於梁梁命客省  
引進使韋堅報之堅還復以銀茶等上獻  
按五代會要但云是月客省引進使韋堅  
使廣州廻以銀茶上獻其估凡四百餘萬

繹其文義似堅以他事使廣州與遣使入  
貢自屬兩事固不云命來答使也春秋誤  
今從會要

加檢校太傅

歐史乾化三年檢校太傅末帝卽位悉以  
隱官爵授龔據此是加太傅在是年末帝  
尙未卽位之前而不書月日十國春秋在  
是年正月按友珪以二年六月行弑友貞



異

以三年二月卽位知太傅之加在友珪鳳  
歷改元時矣通鑑二年七月加錢鏐尙父  
可爲友珪授節鎮官爵之証

梁均王友貞卽位

十國春秋二月梁王鐸卽帝位按薛史通  
鑑並云三月丁未制改名鐸是二月尙名  
友貞也春秋誤

襲封南平王

按通鑑無二月封南平王事惟以貞明元年云以吳越爲國王而已獨爲南平語度之知爲末帝初受封耳歐史云自梁初受封爵宏簡錄末帝初襲王爵五國故事梁朝命冊南平王薛史末帝盡以隱之官爵授陟皆無年月十國春秋繫於乾化三年二月今從之又封川志是年七月封南海王然據通鑑貞明元年求南越王時尙爲

南平王則封川志似誤今闕疑

遺陳用拙如吳越請以兄事吳越王

吳越備史在乾化四年秋七月十國春秋  
在是年春備史當以使至日書之也備史  
又云天祐以後中原多事西川王氏稱蜀  
刊溝楊氏稱吳南海劉氏稱漢長溪王氏  
稱閩皆竊大號或通姻戚或達聘好皆以  
龍衣玉册洎書疏等勸王自大王嘗笑曰

此兒輩自坐爐炭之上而又踞我於上耶  
吾承天子疇庸之命封建車服之制悉有  
所由豈圖一時之利隨波於爾輩也皆却  
之不納而諸國之主無不咸以父兄事之  
又甲戌秋七月廣帥劉巖遣陳用拙奉禮  
幣請兄事於王王納之據此則用拙往聘  
爲一事其後勸進又別爲一事勸進事在  
巖稱號後其何年命使奉使何人均不可

異

考矣

逆婦於楚

通鑑劉巖逆婦於楚蓋遣使往逆也十國  
春秋因云王如楚逆婦則明云親迎矣春  
秋誤

帝表求都統不許復表求改封南越王亦不許  
通鑑以吳越王鏐爲國王已獨爲南平王  
表求南越王及加都統不許十國春秋沿

襲其文似南越王之求先於都統又似兩  
事同在一時並誤今按 欽定全唐

文載梁末帝命錢鏐進取海南敕云而敢  
飛章不紀希寵無厭始求都統四隣後請  
封王南越是先求都統不許而後更求南  
越也又薛史及聞錢鏐封吳越王陟恥稱  
南海之號按是時巖止封南平王無南海  
之稱此當從通鑑

異

帝遣王定保聘於荆南

歐史止云龔欲僭號憚王定保不從遣定保使荆南其出使年月無考十國春秋荆南世家嶺南王定保來聘繫於貞明二年今從之

乾亨元年

卽貞明三年

秋八月卽位

通鑑歐史諸書皆云貞明三年丁丑惟吳越備史貞明四年戊寅夏四月廣帥劉巖

僭稱大漢皇帝年號大有又云進士王詡  
之在南海著昭陽殿賦一篇序云皇帝構  
基乾坤十有八載矣甲子春始作茲殿計  
其甲子則巖本年僭號今據皮氏舊錄而  
書之云前年丁丑僭號其誤明矣按此以  
詡賦甲子春語定爲四年戊寅今由甲子  
而逆推十八年爲中宗乾和五年丁未於  
戊寅且差二十九年由丁丑順推十八年



爲甲午蓋詡賦甲子卽甲午之訛也又稽古錄云貞明三年夏劉龔稱漢帝與備史夏四月稱大漢皇帝號大有同誤按巖先號越明年乃改號漢且先建元乾亨越十一年乃改大有也

徙循州治龍川

惠州舊志並作大寶時事按歸善志十國春秋並云乾亨元年今從之

鑄錢文曰乾亨重寶重三參

李孝美錢譜銅錢重六銖今從洪遵泉志

建玉堂珠殿

薛史作末年事歐史附乾亨元年之末今  
從之

遷雷州治特侶塘

黃通志合州梁大通間置唐改雷州梁開  
平四年遷平樂白院村南漢乾亨二年遷

異

特侶塘十二年遷今衛按乾亨無十二年  
黃志誤今闕疑

梁削帝前封官爵

薛史貞明五年九月丙申制削奪南平王  
劉巖在身官爵以其將謀僭號故也據此  
似削爵在未稱號之前按巖稱號在貞明  
三年去削爵時已先二年矣薛史誤

敕吳越來討吳越以道遠表辭

通鑑止云檄吳越兵來討吳越受命不行  
十國春秋依之按吳越備史朝廷以南海  
僭號詔我師伐之王雖受命而山川隔越  
地方擾攘請以事寢據此則吳越曾具表  
請辭矣今從之

析滄陽爲英州保昌爲雄州

太平寰宇記乾和五年置英州四年置雄  
州始興志乾和四年分始興滄昌置雄州

保昌志載譚大初斃沿河水城記亦云雄  
之爲州自五代南漢乾和始按歐史職方  
考英雄二州並云劉龔置方輿類纂英德  
縣梁貞明中南漢置英州治又南雄府五  
代初南漢置雄州不云置於晟乾和中知  
實宇記乾和爲乾亨之誤今從十國春秋  
又始興志沿革旣以爲乾和四年編年又  
以爲天福八年

是年晟  
初立亦誤

王延美龔帝帝偵知遁歸

通鑑但云偵者告之巖遁逃僅免十國春秋則云宵遁得免宵遁不知其據今從通鑑

製平頂帽

按諸書皆無年月惟十國春秋繫在乾亨六年不知何據今姑從之

復越裳縣爲茂名縣

五代會要作茂明

道宮苑使何詞聘於唐

薛史不詳年月歐史及宏簡錄皆作乾亨  
七年惟通鑑在同光三年卽乾亨九年今  
從之

白虹入南宮三清殿改元白龍

薛史冬白龍見南海歐史白龍見南宮三  
清殿通鑑有白龍見於漢宮漢主改元白

龍均不及五國故事所紀之詳通鑑專在  
十二月故事繫於是年八月云中外震懼  
王宏作賦賀之改元白龍是白虹見後州  
縣皆知宏乃上賦爲賀然後因以改元計  
時當不在八月內今層次一依故事而改  
元仍從通鑑作十二月封川志在乾亨七  
年亦誤又故事止云入三清殿今日南宮  
三清殿者依歐史也十國春秋有白虹化



異  
爲白龍書法似誤

鄭旻求昏以增城公主妻之

滇志作仁旻十國春秋依之今從通鑑及  
歐史歐史事在乾亨七年今從通鑑又封  
川志龔喜持節昭淳好學有文詞以隱女  
增城院君妻之作妻昭淳誤

帝幸康州

德慶州志唐昭宗乾寧元年南漢主劉龔

如康州按夔以梁貞明三年稱帝乾寧元年劉知謙尙未死夔裁六歲州志誤今從十國春秋

南漢書考異卷二終

南漢書卷三

順德梁廷相章冉撰

本紀第三

高祖紀二

大有元年春二月丁酉朔日有食之三月楚人以水軍圍封州州將禦於賀江敗績我兵多溺死帝懼筮之遇大有遂大赦改元命封州刺史左右街使蘇章率神弩軍三千戰艦百艘援封

州章至賀江逆戰佯敗誘楚人多爲我師所殺  
圍遂解帝遷章封州團練使冬十二月丙辰荆  
南王季興薨子從誨立是歲長和鄭旻服丹藥  
卒欽州民掘羅浮山得古劍有銘獻之

大有二年

大有三年夏六月朔日有食之秋九月帝遣將  
梁克貞李守鄜攻交州克之執靜海節度使曲  
承美歸帝御儀鳳樓受俘謂承美曰公常以我

爲僞庭今反面縛何也承美頓首謝伏罪乃赦  
之以李進爲交州刺史冬十月使梁克貞入占  
城取其寶貨以還十一月己巳楚王殷薨子希  
聲立

大有四年冬十一月甲申朔日有食之十二月  
愛州將楊廷藝舉兵攻交州帝遣承旨程寶將  
兵往援未至城先陷刺史李進遁歸殺之寶進  
圍交州城廷藝出戰寶敗死

大有五年春三月庚戌吳越王鏐薨子元瓘  
立秋七月辛卯楚王希聲薨八月弟希範立是  
歲帝封其長子耀樞爲邕王二子龜圖爲康王  
三子洪度爲賓王旋徙封秦王四子洪熙爲勤  
王旋徙封晉王五子洪昌爲越王六子洪弼爲  
齊王七子洪雅爲韶王八子洪澤爲鎮王九子  
洪操爲萬王十子洪杲爲循王十一子洪暉爲  
息王十二子洪邈爲高王十三子洪簡爲同王

十四子洪建爲益王十五子洪濟爲辨王十六子洪道爲貴王十七子洪照爲宜王十八子洪政爲通王十九子洪益爲定王

大有六年春正月閩王卽帝位改元冬十一月戊戌唐帝殂十二月癸卯宋王從厚卽皇帝位改元應順是歲帝遣左僕射何瑱如吳越致祭大有七年春閏正月己巳蜀主知祥卽帝位改元帝作殿於內宮成賜名曰昭陽殿親題其榜



中書舍人王詡作賦頌之夏四月唐帝廢潞王  
從珂卽皇帝位改元清泰秋七月甲子蜀主知  
祥殂子昶立改元冬十二月辛巳皇后馬氏殂  
帝命秦王洪度判六軍洪度募宿衛兵皆無賴  
同平章事楊洞潛切諫帝不聽洞潛謝病去

大有八年春二月閩廢我清遠公主立宮婢陳  
氏爲皇后冬十月庚辰閩主鏐遇弒殂子繼鵬

立

大有九年夏四月帝遣將軍孫德成侵楚攻蒙  
州復分兵攻桂州楚王自將步騎五千以禦我  
師德成自蒙州引兵還冬十月以宗正卿兼工  
部侍郎劉濟爲中書侍郎同平章事十一月丁  
酉契丹主使石敬瑭卽皇帝位國號大晉改元  
天福

大有十年春正月乙卯朔日有食之三月帝疾  
愈大赦交州牙將皎公羨殺安南節度使楊廷

藝據交州秋九月丙寅吳主禪位於齊王李昇  
冬十月甲申齊王昇卽位國號唐改元十二月  
南唐遣使來告卽位是歲封州團練使蘇章卒  
大有十一年春正月己酉朔日有食之冬十月  
楊廷藝故將吳權攻交州皎公羨使以賄來求  
援帝欲乘其亂取之崇文使蕭益諫不聽遣大  
將梁克貞領兵赴交以萬王洪操爲靜海節度  
使徙封交王令統戰艦趨白藤帝自帥師屯海

門爲應會權已殺公羨引兵來逆戰佯敗誘我  
我師敗績洪操死之帝哭之大慟引餘兵還是  
歲遣集賢殿學士鄒禹謨如南唐賀卽位詔韶  
州證真寺僧文偃入朝

大有十二年秋七月庚子朔日有食之閏月壬  
午閩主繼鵬遇弑殂叔義立改元冬十二月門  
下侍郎同平章事趙光裔卒帝以其子翰林學  
士承旨尙書左丞損爲門下侍郎同平章事是

歲遣諫議大夫李紆聘於楚楚使來報聘

大有十三年春帝遣使聘於南唐冬十月遣都  
官郎中鄭翽如南唐賀仁壽節十一月丁丑望  
月有食之是歲門下侍郎同平章事趙損卒以  
寧遠節度使王定保爲中書侍郎同平章事

大有十四年夏五月帝遣攝太尉工部侍郎盧  
膺尙儀謝宜清尙衣高素清如吳越求故王弟  
新安侯傳璠之室馬氏爲后楚亦遣其中軍使

歐陽練至吳越勸行馬氏誓不許秋八月辛亥  
吳越王元瓘薨子仁佐立冬十二月帝寢疾胡  
僧言讖書帝名不利於國帝取周易飛龍在天  
之義更名夔遣區延保聘於南唐是歲中書侍  
郎同平章事王定保卒

大有十五年春三月帝不豫召右僕射兼西院  
使王翺謀立儲翺請出秦王洪度鎮邕州晉王  
洪熙容州立越王洪昌爲太子帝以爲然制命

將行會崇文使蕭益入問疾帝更訪之益力諫  
乃止夏四月帝避暑於甘泉宮丁丑殂年五十  
四在位二十有六年帝性聰辨多權數好自誇  
大每對北人言家本咸秦耻爲南蠻主謂中朝  
天子爲洛州刺史然素嗜殺製造酷刑有灌鼻  
割舌支解剝剔炮炙烹蒸鎚鋸及湯鑊鐵牀諸  
法或聚毒蛇水中以罪人投之曰水獄又下湯  
鑊後加日曝沃以鹽醋肌體腐爛尙能行立腥

穢之氣充沸殿庭每決事垂簾便殿有司在階  
下屠膾罪人帝必垂涎朶頤若喻其膏肉氣者  
久之復常乃引罪人退人以爲真蛟蜃也暴政  
之外惟治土木皆極瓌麗作昭陽秀華諸宮殿  
以金爲仰陽銀爲地面榱桷皆飾以銀下設水  
渠浸以真珠琢水晶琥珀爲日月分列東西樓  
上造玉堂珠殿飾以金碧翠羽晚年出新意作  
南薰殿柱皆通透刻鏤礎石各置爐燃香自言



隋帝論車燒沈水却成麤疎爭似我二十四箇  
藏用仙人縱不及堯舜禹湯亦不失作風流天  
子嶺南故珠璣所聚稱號後復西通黔蜀得其  
珍玩窮奢極侈娛竊一方嶺北行商至國都必  
召示之誇其富以士人多爲子孫計專任宦者  
故內官獨盛於他國葬興王府城東二十里北  
亭鎔鐵錮其外使不可啟謚天皇大帝廟號高  
祖陵曰康陵

殤帝紀

殤帝玠初名洪度高祖第三子也先封賓王徙封秦王母趙氏封昭儀高祖生子耀樞最長次龜圖皆蚤卒帝以次當立高祖寢疾大漸以帝性不類已召右僕射王翻謀將使帝與晉王出鎮逾次立越王洪昌爲太子議定以告崇文使蕭益益諫曰立嫡以長少者立長者爭之禍始此矣由是帝卒得立大有十五年夏四月卽位

更今名改元以是年爲光天元年

光天元年夏四月帝尊母昭儀趙氏爲皇太妃  
以晉王洪熙輔政遣蕭規如南唐告哀遣法物  
使公孫惠如南唐告卽位五月丙申葬天皇大  
帝於康陵定廟號曰高祖六月乙丑晉帝崩齊  
王重貴卽皇帝位秋七月正州妖賊張遇賢反  
自稱中天八國王建元永樂置百官攻陷循州  
刺史劉傳戰死以越王洪昌爲都統循王洪杲

爲副討之遇戰於錢帛館我師敗陳道庠萬景  
忻翼二王潰圍出東方州縣爲遇賢所陷授洪  
杲桂州觀察使改邕州爲誠州冬十月丙子張  
遇賢陷循州是歲使滕紹英如南唐賀仁壽節  
光天二年春正月閩富沙王延政稱帝於建州  
國號殷改元三月乙卯朔南唐主昇俎子璟立  
改元丙戌晉王洪熙使都指揮使陳道庠等弑  
帝於長春宮帝性庸昧既立益恣荒淫不親政

事高祖在殯常作樂飲酒置東西兩教坊伶官  
千餘人常令晝夜出入宮中內常侍吳懷恩時  
典宿衛屢以爲言帝不省又常裸男女爲戲夜  
與倡婦微行入民家左右忤意者輒死由是嶺  
海多盜賊越王洪昌切諫之亦不聽因疑諸弟  
圖已每宴集敕內官守關供奉將吏入者皆露  
體搜索之洪熙陰懷異志乃盛飾聲伎娛帝以  
成其惡知帝好手搏令道岸引多力者劉思潮

譚令禮林少強林少良何昌廷等習爲角觝以  
獻帝召諸王宴於長春宮使共觀之以爲樂夜  
罷宴醉甚洪熙故令道庠等掖帝因爲道庠等  
所弑血濺寢門左右咸被殺初高祖命帝判六  
軍募宿衛兵千人皆市井無賴子弟帝昵之楊  
洞潛諫曰秦王國之冢嗣使之治軍已過矣况  
昵群小乎高祖以爲迂至是卒及於禍帝在位  
二年年二十四諡曰殤

南漢書卷三終

南漢書考異卷三

順德梁廷枏章冉撰

高祖紀二

執曲承美伏罪赦之

太平御覽引南方異物狀云余寓番禺曾  
遊新會遇安南歡好使麴將軍名承美見  
養一鸚鵡承美爲歡好使諸書無考云遇  
於新會則旣被襲俘後矣或當時赦而官



之也然通鑑歐史並作曲承美此作麴又  
疑別爲一人他無可據今姑闕疑

以李進爲交州刺史

史纂左編云梁末交州土豪曲承美據有  
十二州之地南漢遣將攻承美執之置交  
趾節度使按馭交記無置交趾節度事歐  
史大有四年楊廷藝攻交州刺史李進遁  
歸則當時止以進爲交州刺史不云節度

也宋史劉隱伐曲承美執之乃并有其地  
後有楊廷藝紹洪皆受廣南署繼爲交趾  
節度使據此則南漢曾置節度以廷藝爲  
之或廷藝納欵於陷交州後南漢因授之  
也置節度事年月無考今姑闕書而附見  
於此李進方輿類纂作進之云劉夔拔交  
州以其將李進之守諸書皆無之字或文  
之誤倒也

封子爲王

諸子洪度等通鑑並作宏邕王通鑑作雍  
息王作恩又五國故事封其子十八人爲  
王在乾亨改元之後九年白虹入三清殿  
之前按巖子十九人歐史與通鑑諸書並  
同又按巖卒年五十四在位凡二十六年  
則乾亨九年巖年止三十六諸幼子當未  
盡生同時並封事自當從歐史大有五年

爲正洪度先封賓王後徙秦王則從通鑑也

遣左僕射何瑱如吳越致祭

十國春秋南漢紀在大有七年甲午吳越紀又在長興四年癸巳使至吳越乃反先南漢命使一年大誤按吳越王以大有五年三月卒與國聞訃往祭斷無遲至三年之久吳越備史在長興四年七月所書爲

使至年月命使日月則無考矣其年唐李  
錯張袞吳許確百濟國李仁旭均往吳越  
致祭事同一律可以例斷知備史不謬也  
今依其年而月從闕

昭陽殿成王詡作賦頌之

五國故事注云已上見進士王宏昭陽殿  
賦以賦爲宏作今從吳越備史

孫德成侵楚攻蒙州復分兵攻桂州

成通鑑作威今從歐史歐史止云攻蒙州  
不克無攻桂州事今從通鑑

齊王昇卽位國號唐

陸氏南唐書及歐史皆云先號齊復姓後  
乃改號唐惟通鑑冬十月甲申卽位改元  
國號唐注云徐誥自以本李氏之子旣舉  
大號欲慕唐緒故號唐爲復李姓張本按  
通鑑無號齊事今省文姑從通鑑

十二月南唐遣使來告卽位

十國春秋南漢紀事在大有十年十月誤  
按陸氏南唐書十月庚子遣使如漢閩吳  
越荆南告卽位以薛史是年九月庚戌朔  
計之庚子爲十月二十一日則使至南漢  
斷不在十月內矣使至月日無考今度其  
道里附於是冬十二月後

遣鄒禹謨如南唐賀卽位

陸氏南唐書在昇元二年五月是年卽南  
漢大有十一年十國春秋闕書其遣使月  
日無考今統附是年下

閩主義立改元

閩中啟運圖云通文四年己亥閏七月延  
羲立明年庚子改元永隆按十國紀年周  
世宗實錄唐餘載運歷圖紀年通譜並云  
通文四年改元永隆卽南漢大有十二年



也今從之

遣區延保聘於南唐

陸氏南唐書在昇平六年閏正月卽南漢  
大有十四年遣使月日無考按是年閏正  
月甲申朔南唐書繫此事於是月癸巳閏  
使來聘之前從正月朔距延保至南唐不  
過三十餘日則南漢命使時似尙在大有  
十三年冬也十國春秋繫於十四年誤

趙損卒

通鑑十國春秋皆不詳何月惟南漢春秋繫於冬十二月諸書無據今仍依通鑑統書於大有十三年之末

四月帝避暑於甘泉宮丁丑殂

十國春秋三月丁丑殂自注云從通鑑今按通鑑在四月丁丑固不云三月也春秋誤按五國故事是歲夏四月避暑於甘泉

異

宮時長星見乃效宋孝武萬歲之說未幾而殂薛史亦云夏四月陟以疾卒今並從之

謂中國天子爲洛州刺史

按通鑑與薛歐兩史少有不同異並作龔語惟五國故事作晟語今從薛史

列東西樓上

十國春秋作列於東西玉柱之首今從五

國故事

葬興王府東二十里北亭

十國春秋云在城東二十里之漫山今據  
朱彝尊曝書亭集

殤帝紀

玠初名洪度

稽古錄天福七年夏漢主龔俎子昂嗣又  
八年漢主昂弟晟殺昂自立然則玠又名

異

昂矣今從歐史龔以四月死據此云夏殂  
益証十國春秋三月之誤

高祖第三子

薛史玠陟長子按歐史龔子耀樞龜圖皆  
早死玠次當立今從之

遣蕭規如南唐告哀法物使公孫惠如南唐告  
卽位

南唐書告哀事在昇元六年六月告卽位

事在八月按命使月日皆無考十國春秋  
繫於四月是誤以卽位爲三月度之也今  
統附尊母爲皇太妃下

葬天皇大帝於康陵

通鑑在是年秋八月之後冬之前本無月  
日十國春秋誤繫於八月按曝書亭集盧  
膺撰高祖墓碑文曰維大有十五年歲次  
壬寅四月甲寅朔念四日丁丑高祖天皇

異

大帝崩於正寢越光天元年五月癸未朔十四日丙申遷神於康陵今從之

使滕紹英如南唐賀仁壽節

陸氏南唐書事在昇元六年十二月按命使年月無考十國春秋繫在九月因道里遠近度之無據今闕疑統附是歲末

晉王洪熙使指揮使陳道庠等弒帝於長春宮薛史晟與弟越王洪昌等弒玠歐史玠世

家洪熙洪杲洪昌陰遣陳道庠養勇士劉  
思潮等習爲角觝獻玠兩史皆謂三王合  
謀行弑通鑑晉王洪熙欲圖之令陳道庠  
引劉思潮等習手搏於晉府又漢主大醉  
洪熙使道庠等拉殺之九國志及晟將爲  
亂謀於道庠習角觝於晉王府中又晟遣  
道庠等掖之據此則首逆實止洪熙一人  
今按歐史晟世家云洪杲屢請討賊勸晟



誅思潮等通鑑亦云明旦諸王莫敢入宮  
洪昌帥諸弟臨於寢殿則洪昌洪杲均不  
與亂謀明矣今從通鑑及九國志

左右咸被殺

九國志因拉殺玠左右皆散走不云盡殺  
也今從歐史及通鑑

南漢書考異卷三終